



UPA 2015/131

24/03-2015

Michael Rosing

Akuunerulersitsinissaq pillugu Naalakkersuisut nalunaarusiamik saqqummiussinissamut Inatsisartunit suliakkerneqarnissaannik aalajangiinissamut siunnersuut. Nalunaarusiami ersersinneqassaaq inatsisartut oqaatsit pillugit inatsisaanni § 5, imm. 1 naapertorlugu kalaallisut oqaatsinik ilinniarnissamut pisinnaatitaaffik qanoq sunniuteqarnerseq, sunniutaalu naammaginartutut isigineqarsinnaanersaq. Taamaangippat sunniutaasup amigaataanerani naammaginanginneraniluunniit aporfiit suunersut paasissutissiissutigineqarnissaat kissaatigineqarpoq. Nalunaarusiami oqaatsinik ilinniarnissamut pisinnaatitaaffiup inatsimmi § 5, imm. 2 tunngavigalugu nalunaarusiuunneqarnissaa tamatumalu qanoq pinissaa inassutigineqassaaq. Peqatigitillugulu nunatsinni inuiaqatigiinnut, kulturimut, ileqqunut, peqatigeeriaatsinut naleqartitanullu tunngatillugu assigisaanik malittarisassaartoqarnissaanik pisariaqartitsisoqarnerseq nalunaarusiami naliliisoqassaaq.

(Inatsisartunut ilaasortaq Juliane Henningsen, Inuit Ataqatigiit)

(Siullermeerera)

Demokraatini isumaqarpugut, Naalakkersuisut suliniutaat suugaluartulluunniit aningaasat siunertamut immikkoortinneqartut atorlugit angusaqarfiusariaqartut kusanartunik. Kalaallit oqaasiinut ilinniartitsinissaq eqqarsaatigalugu uangut isumaqarluinnarpugut taamaattoqanngitsoq. Taamaattumik qularinngilarput nassuiaasiarineqaqqusami erserumaartoq oqaatsit pillugit inatsimmi § 5 sunniuteqarsimanngitsoq.

Uangut isumaqarpugut kalaallit oqaasiinik ilinniartitsinissamut tunngatillugu pingaarnersiuisimaneq kukkusuusoq. Suliniutip ilarujussua danskit maani najugaqareersut ilinniartinneqarnerannut atorneqartarpoq, angusaqarfiungaanngitsumik. Isumarput naapertorlugu tamatuma takutippaa assigiinngitsunut kalaallisut ilinniartitsinerup qanoq pitsaanerusumik ingerlannissaanut ilisimatusarnissaq pingaarnerusariaqaraluartoq, ilinniartitsineq sunniuteqarpianngitsoq ingerlanniinnaqinagu.



Assersuutigalugu qularutissaanngilaq, kalaallip uattut ittup, danskisut oqaasillip kiisalu nuuttup qanorluunniit oqaasillip pisariaqartikkippit assigiinngitsumik ilinniartinneqarnissarput. Aamma qularutissaanngilaq kalaallisut piginnaaneqarnerulernissamut aqutissaq tassaasoq kalaallinut kalaallisut oqalussinnaanngitsunut ilinniartitsinissaq, soorlu uattut ittunut. Tassungali tunngatillugu pædagogik-i pisariaqartoq pingaartinneqanngisaannarsimavoq. Qanittunnguaq tikillugu nuuttutut uangutsitut kulturikkut tunuliaqjutaqanngitsutut taamaattorli uangutsitulli oqparlutsigisutut pikkorissaqqulluta innersuunneqartarpugut.

Tamanna tunngavigalugu Demokraatini nuannaarutigaarput, Naalakkersuisut siunertarimmassuk matuma siunnersuutip siunissami oqaatsinut inatsisip nalilersorneqarnissaanut ilanngunneqarnissaa.

Taamatut oqaaseqarluta siunnersuut Kulturimut, Ilinniartitaanermut Ilageeqarnermullu Ataatsimiititaliami suliarineqassasoq innersuussutigaarput.